

欽定剿平三省邪匪方略

欽定剿平三省邪匪方略正編卷一百三十二

己未年

十一月初八日

壬戌

松筠奏言

臣

接准德楞額來

咨將首逆高均德等犯派委侍衛車森保參將

伯明帶領弁兵檻送漢中並令

臣

添派文員協

解

臣

當委候補知府那英等協同管解並派撥

兵勇在棧道內分段護解咨明山西直隸督撫

一體撥護其高成傑一犯係高均德親叔恐有

應行質訊之處一併解送進京又准德楞泰來

信據稱督率官兵分路剿殺賊匪生擒教首劉

學仁並殲斃首逆張士虎一面將張士虎首級

及劉學仁解至漢中令臣細加驗訊臣監提高

均德辨認據供在河南會見過張士虎模樣實

在相似訊之劉學仁及賊犯陳鵬萬均堅供實

係張士虎首級查張士虎係劉學仁徒弟且同

在一處是張士虎之死似無疑義所有劉學仁

陳鵬萬二犯監禁漢中候

旨辦理至王文雄等於德楞泰未到之先在閩王礪

殺賊一百餘名又在堰口殺賊二百餘名嗣隨

德楞泰分投堵剿亦有斬獲其紫陽境內張添

倫辛聰等股業經柯藩堵剿出境再冉添元等

復由西鄉竄入紫陽分爲三股經柯藩在涼風

崖打仗殺賊一百餘名又在黃瓜涇殺賊一百  
五十餘名兩股分由大山岔朝天溝竄回川省  
太平惟一殷闖入安康義首從九品職銜汪兆  
洪在榨溪截堵奮勇力戰殺賊多名受傷陣亡  
興安府知府周光裕副將劉成基趕赴通草壩  
迎頭截擊賊匪竄回權河道員溫承惠自平利  
帶領鄉勇趕至磚坪地方堵截賊匪遂由六道

河折回太平臣仍飭該鎮道等小心防堵其西

鄉南面賊匪雖多而德楞泰自北而南額勒登

保自南而北兩面夾擊不難以次殲除臣惟有

督飭地方文武於沿江一帶加意嚴防毋令偷

渡並將一切軍火糧餉源源接濟再慶成現已

調回漢中訊辦其所帶撒拉爾回兵亦已撤回

俟到漢中仍令原帶之知府王榮棨等送回循

化又

臣

前接德楞泰來信需用弓箭火繩火藥

鉛彈等項業已辦解並運送餉銀一萬六千兩  
添辦棉得勝褂六百件套褲六百雙爲吉林滿

兵禦寒之具並辦布鞋三千雙帳房二百頂以

利軍行一面仍飭局員將弓箭軍火陸續辦送

前此額勒登保在西鄉剿辦齊家營餘匪接濟

鹽糧之外亦會辦給衣履又據德楞泰將擒獲

唐大信四房之妾邱氏解送漢中臣覆加審訊

據供住家西鄉本年八月內因賊匪逼近跟隨父母搬移上寨行走落後被賊裹去逼脅爲妾

臣現飭提該氏之父武生邱方顯到案質認如

果屬實該氏勢由裹脅爲日不久應請免其緣

坐

松筠又奏言查永保於前月二十日自西安押



解起程計那彥成日內趕到明亮與肇軍營傳

旨革職所帶之兵統領有人臣已派將弁前往迎解

不日皆可到郡慶成亦已調回漢中俟到齊後

逐一究訊其逗遛觀望謊報殺賊情節令永保

明亮當面質對務使水落石出以成信讞而服

兩人之心所有得受餽送提用餉銀嚴加審訊

務得其實分別情罪按律定擬至恒瑞在甘肅

圍剿張逆有無觀望會否縱賊逃竄容俟確切查明再行核辦再陝省軍餉前撥銀一百萬兩因到陝尙需時日經藩司馬慧裕於甘省兵餉內截借四十萬六千兩暫資接濟毋庸復截末起川餉所有廣興托津護送川餉二百萬兩均經派撥員弁兵勇分段照料於前月二十四日全行出境交四川委員接收

松筠又奏言查節次欽奉安撫

諭旨均經敬錄謄黃遍行張貼恐鄉愚多不識字且隨賊奔走無暇觀閱必須差人親入賊中剴切宣示方可釋其疑懼隨選派員弁兵勇分投曉諭數月以來每逢官兵打仗多有投出者現經投効候選通判王樹勳於鎮安之張家坪招出黃觀美等二百三十餘名又於西鄉之小河口

招出顧朝先照貴等三百餘名皆係脅從附和  
之人繳出鎗矛三百件均酌賞盤費給與路票  
散遣回籍該員改裝行險設法勸諭辦理已有  
成效應仍遣該員由棧道而東沿途躡探如深  
山密箐之中有潛行竄匿者招之使出相率投  
誠庶南山境內自可易於肅清惟是山深徑僻  
最爲藏奸之藪必當酌加清理伏查終南山古

稱綿亘八百餘里而東連二華西接隴首實長  
千有餘里北界渭河南界漢江西安鳳翔同州  
三府所屬跨渭河南岸者則謂之南山漢中興  
安商州三府州所屬跨漢江兩岸者則謂之北  
山南北相距自五六百里至七八百里不等其  
北面山口大者若大散關斜塔駱峪子午峪大  
峪口藍關三要關約七八處小者若桃川號川

庫谷錫谷義谷芒谷約十餘處其南面直達漢  
江江岸路徑紛歧不可悉數承平日久生齒日  
繁山多開墾木拔道通乾隆初年川楚貧民前  
來種地河南江西安徽等省民人亦有挈家而  
至者以次開荒間成村落距該管州縣本城遠  
至四五百里鞭長莫及四十四年前撫臣畢沅  
奏請孝義川添設同知一員五郎關添設通判

一員割出咸寧長安二縣山內之地分隸該丞  
倅管理山中始有專官而蓋屋郿縣之南洋縣  
城固之北鎮安五郎之西鳳縣留壩之東中間  
數百里並無員弁分防彈壓邇來山地益闊路  
徑愈紛誠宜察看形勢或建縣治或設廳署並  
安設營汛移駐弁兵以資巡防而連聲勢爲因  
地制宜之計惟是可耕之上俱已開墾所餘老

林非地上礪礪卽崖勢險峻人力難施且開荒  
一事亦必爲之以漸川楚等省貧民能耐辛苦  
山頭嶺角搭一草棚卽可棲止所伐樹木近水  
者順流推放出山貨賣其不近水者隨地堆積  
日久腐爛蒸爲香蕈木耳等物售與商販均可  
獲利以爲工作資本其耕種之勞十倍於平地  
所種惟包穀爲多土膏不厚三五年後又須另



覓別地俟荒蕪數年薙草焚灰方可再耕或因  
也不成熟卽徑回原籍及另圖貿遷者來去不  
常無所繫戀此所以地勢日闢不能按則陞科  
民雖日增不能埃戶編籍也地方官設法稽查  
不過舉其寄居年久者名爲客頭令其約束而  
地方遼濶五方雜處游手無賴之徒溷跡其中  
難保無煽誘勾結之事必須設官安汛頒行教

令方足以經久遠撫臣台布帶兵剿賊無暇兼

顧

臣

俟審案事竣卽當親入山中遍加履勘將

添官設汛各事宜悉心經理會同台布妥議請

旨遵辦其漢江以南平利安康紫陽西鄉各縣及洋

縣南鄭褒城所屬地方與湖廣四川連界山勢

險惡地處邊徼亦當籌畫萬全一體照辦均奏

入

上命軍機大臣傳諭松筠曰據松筠覆奏慶成現已  
調回漢中訊辦撒拉爾回兵亦遵旨撤回送歸循  
化前次松筠檄調撒拉爾回兵朕卽以此項回兵  
在甘肅本境剿賊自屬得力若調赴陝省伊等遠  
離鄉里未必樂從松筠遠行檄調殊爲失當是以  
令其酌量遣回至慶成係獲罪待訊之人又無頂  
戴令其帶領撒拉爾回兵尤屬冒昧重愆因降旨

嚴飭松筠會爲軍機大臣何不曉事至此實不可  
解如果所調回兵在陝剿賊奮勇正資其力松筠  
卽不應遽爾撤回乃旣經檄調於前而一奉諭旨  
後又旋即撤回可見此項回兵在陝本無足重輕  
而松筠之忽調忽撤胸中全無把握此時松筠旣  
委員將回兵送歸循化其中如有打仗出力及曾  
經受傷者當優加獎賞沿途妥爲照料卽令回巢

不必稽延若再有游移或又將回兵留用更屬不成事體矣再德楞泰所獲賊匪劉學仁陳鵬萬二犯已解交松筠處著松筠分別凌遲斬決卽在漢中地方正法梟示其在安康殺賊陣亡之義首從九品職銜汪兆洪著咨部賜卹又所奏籌辦招撫及南山善後大概情形此當歸入善後事宜實心實力次第妥辦者昨旨亦有在五郎等處安設

總兵等官之奏俟陝省賊匪肅清後松筠當會同  
台布詳加履勘悉心經理以期控制得宜爲久安  
長治之計至候選通判王樹勳於賊夥內招出多  
人尙屬能事並著松筠查明如實係出力酌量以  
應酬之缺奏請補用再明亦興肇慶成永保交與  
松筠審辦如有少異松筠本日奏到之摺尙未定  
擬罪案等語據元明亮之罪一係在樂莊牧護關

此論三處憑空捏報打仗一係傾陷永保一係  
受湖北餽送松筠當嚴切跟究實情勿任稍有  
合擬永保之罪係在大山岔避賊逗遛多日此當  
與明亮當面質証者若果係永保有心逗遛大山  
岔而又捏造明亮字札希冀掩飾則永保之罪更  
重伊四年來未有寸長足叙且伊自棄瑕錄用後  
並不稍知感奮在湖北軍營又得受餽送皆其罪

欵慶成到陝帶兵總未趕上賊匪在湖北軍營亦  
會收受餽道興華隨同明亮誑報軍情俱有應得  
之罪此內丞保有罪無功明亮雖屢著微勞慶成  
亦曾得受鎗傷但伊等功罪權衡輕重朕自有裁  
度松筠審辦此案惟當實訊明確按律科斷伊等  
皆係帶兵大員自應迅速結案且松筠現辦軍需  
又有地方事件并一切善後事宜皆當於審結此



案後次第辦理尤不應稍有遲緩一經審結其罪  
應發遣者卽可在該處候旨發遣罪應斬絞者解  
京核辦應速行定擬由驛加緊馳奏至摺內稱恒  
瑞在甘肅剿賊查明覆奏一節恒瑞本在甘境專  
剿藍號賊匪係松筠令其回陝何得轉稱確查恒  
瑞有無覩望爲此醜顏之語耶再唐大信之妾邱  
氏旣據訊明係被賊裹去應免緣坐松筠現已飭

提該氏之父邱方顯到案一經認明自當令其領

回

初十日

甲子

額勒登保奏言竊

臣

率領官兵往白

沙河一帶趕剿徐添德等股賊匪十九日師次

錦雞壩接據七十五呈報該提督於十八日由

南壩場過河探得鮮苟等逆經穆克登布等緊

追向檀木壩一帶逃竄七十五等卽督兵趕擊

賊匪猝遇官兵折奔聖燈寺官兵緊追斃賊一  
 百餘人賊匪又於高登坪上山適穆克登布所  
 帶馬隊官兵從高登坪山後吶喊衝下賊匪亂  
 竄官兵兩路並擊斃賊三百餘人餘匪又向道  
 士灘上入廂一路而遁臣查道士灘係向東鄉  
 一帶之路當即飛飭七十五等仍往開縣截剿  
 張姓之賊并思鮮大川等殘敗匪眾既經折回

白又必與徐逆等合夥并令穆克登布等緊躡  
前來以便與臣合剿二十一日臣帶兵至城隍  
壩探得賊匪竄聚後槽相距祇三十餘里遂將  
官兵分爲兩路令楊遇春格布舍帶兵爲一路  
由桑樹坪前進臣率同許文謨爲一路由渡口  
巖前進兵勇繼上後槽對面山梁賊匪輒攢聚  
人衆下山過溝直撲楊遇春之兵已繞至溝內

將賊匪衝斷衆兵齊聲下壓賊匪被殺及自相踐踏死者約一百餘人後槽山上之賊當欲下山我兵用礮轟擊叠斃賊衆該匪等向後山逃竄我兵兩路乘勝搶上山梁追過大山數重沿途斃賊二百餘人生擒嚴士俊等五十餘名惟遊擊夏鈞躍馬緊追被賊矛戳陣亡午後霧氣過大暫於後槽駐營將俘獲之賊詳加訊問據

供此股賊首係王光祖徒弟伍金柱領賊三千  
餘人戰手甚少近由西鄉一帶竄來前日到後  
槽與徐添德相會欲與合夥又聞官兵將到徐  
添德說我且帶四五百人先走探路爾等在後  
堵禦官兵當將該犯等正法是晚又據穆克登  
布報稱本日帶兵抵華尖壩聞鮮苟等逆欲向  
亮風壩逃竄臣查亮風壩距後槽四十餘里卽

派楊遇春帶兵連夜赴亮風埡埋伏以爲截擊

之計臣次早卽同許文謨趕追伍金柱等賊酋

道抄向亮風埡官兵正在各山與賊接仗前後

俱有賊匪人數頗衆臣驅兵奮力並進叠經官

兵到處衝殺屍橫徧山約計有三百餘人生擒

句起茂等二百餘人維時驍騎校委防禦富楚

那領催委防禦愛弼達中矛陣亡協領達斯呼

爾岱帶領五六騎趕射騎馬賊匪疊經斃賊被  
賊戮傷馬匹棄馬復又射賊猝受矛傷幸兵勇  
扶掖而回官兵追殺一日薄暮收兵查訊活口  
所有徐添德王登廷鮮大川伍金柱等股賊匪  
因破官兵剿潰總在此一帶潛藏拏獲之賊均  
係各股內夥匪並訊出徐添德之女三人又訊  
出張子聰股內偽總兵一名羅思孝據供今日



山下賊匪乃係張子聰雷四旺爲首前竄雲陽  
因夔府一帶俱有官兵卽由開縣溫湯井折回  
遇朱大人官兵截剿傷斃甚多因連夜竄來旋  
據朱射斗報稱二十一日在枯草坪遇賊與侍  
衛安祿率領馬步官兵於霧雨中搶上汪家山  
梁擒斬賊匪一百六十餘人滾巖跌斃者無數  
此股查係張子聰等賊衆合之羅思孝供詞相

同隨將羅思孝及所獲各犯分別凌遲正法查  
各股賊匪前後遇兵剿殺其勢實已窮蹙而奔  
竄無常倏分倏合如追此股而彼股適來兵行  
靡定糧道益艱兼之十月以來山中氣候不齊  
非雨卽霧高山且有積雪寒冷異常官兵等雖  
備嘗艱苦尙皆勇往用命臣前曾札知達州局  
每兵借支銀三兩添製棉衣各項茲魁倫業經

飭局趕製備解可爲禦寒之具查連日剿潰之  
賊張子聰伍金柱等又向開縣一帶東竄其徐  
添德王登廷鮮大川苟文明楊開甲等又折向  
東鄉太平地界仍復北竄臣先經派有七十五

李紹祖朱射斗等兩路共帶兵勇一萬有零俱

在開縣一帶臣飛行飭知務將張子聰伍金柱

等匪剋日剿盡勿令遠竄臣督率阿哈保楊邁

春穆克登布許文謨等將官兵酌分數路卽行  
起剿徐添德等北竄之賊再德楞泰在西鄉所  
剿賊匪探得已有竄過太平一帶者更當偵探  
確實迎頭擊殺又據朱射斗稟稱前在枯草坪  
遇賊接仗朱射斗與侍衛安祿分兵追至汪家  
山維時霧雨甚重安祿帶兵係從左手搶上山  
梁與朱射斗兩路剿殺賊賊一百六十餘名安

祿見有賊匪數千人奔下山溝卽帶領跟隨五  
六人奮力下壓賊衆潰敗安祿尙策馬緊追不  
料樹林中突出數賊用矛直戳安祿墜馬殞命  
經弁兵等將屍擡回棺殮送至開縣查安祿人  
本勇敢自到軍營以來屢請各自帶兵臣恐其  
年輕未卽分派而每隨臣臨陣見其舉動詳愼  
頗有主持是以昨令其帶領馬步官兵與朱紂

斗合路剿賊乃竟猝中賊矛陣亡實爲可惜除

札致魁倫轉飭地方官妥爲照料令其靈柩回

旗所有該一路馬隊官兵

臣

卽酌派春寧前往

帶領仍與朱射斗等併力剿賊再各路患病官

員有留在達州調養者頃據魁倫札稱三等侍

衛祥金保年四十八歲曾出兵三次受矛傷一

處現患瘋病不時舉發恐難調理速愈又陝西

河州右營遊擊金積福年六十七歲曾出兵湖  
南並節次隨營剿賊現患脚氣胃氣吐血等症  
又山東高唐營遊擊郭起麟年五十八歲前在  
湖北打仗受石傷一處現患瘋痰病症週身麻  
木當此用兵之際未便令該員等久住達州該  
員等均經隨征出力可否以原品休致之處出

自

聖恩再前有遊擊阿克東阿帶兵一千餘名自甘省  
追剿楊開甲等股賊匪入川嗣經松筠以楊開  
甲等已由川省派兵剿辦西鄉一帶防兵較單  
飭調該遊擊率領原帶弁兵卽往西鄉駐守據  
駐劄太平都司李廷臣稟稱遊擊阿克東阿並  
守備馬廷祥帶兵於九月二十五日行至西鄉  
太平界牌地方馬廷祥帶兵先行阿克東阿在



後行走不料猝遇賊匪衝出阿克東阿力戰陣  
亡把總廖榮亦同時被害馬廷祥收集兵丁已  
往西鄉有同時衝散之兵陸續來至太平都司  
李廷臣暫行收管當經批飭李廷臣及馬廷祥  
將現存兵丁及所傷兵數另行據實具報一面  
咨明松筠查辦

額勒登保又奏言此次剿辦教匪官兵打仗多

係馬隊在前步隊在後馬隊一經衝出步隊更  
得痛事剿殺是以馬隊最爲得力賊之所懼者  
亦在馬隊且目下賊股俱係節經剿潰之餘不  
敢屯聚一見官兵輒亡命亂竄尤仗馬力馳驟  
便於截擊惟吉林索倫官兵乘騎之馬每日或  
行八九十里或百數十里日久並無停息旣易  
倒斃而時遇懸崖陡坎滾跌損傷者亦復不少

節經調撥添補並各官有自行添買者有得自賊人者隨時貼補騎用仍屬短絀當此剿賊萬緊之際實有不得不用之勢此一帶山高嶺大甘省之馬不甚得力必須四川雲貴所產之馬方能合用臣悉心籌酌應於三省共購馬一千五百匹所有四川本省業經札致魁倫或行調取或就近採買五百匹卽行解營其雲貴二省

各辦馬五百匹或可調撥營馬或須採買

臣

亦

卽咨商該省督撫酌量辦理再各該省採買馬匹若仍照例價派自民間吏胥作奸不惟馬匹庸劣只圖充數而且閭閻又多擾累該督撫竟應飭知地方官照依市價採辦或調或買得有成數約以一二百匹爲一起分起解營隨處更須認真餵養以免疲乏至四川之馬如卽到營

臣  
先行分撥各官兵應用并德楞泰所領之馬  
隊亦卽一體酌給雲貴之馬計於年內可到倘  
到川時軍務業已完竣川中各營馬匹均有缺  
額卽可留爲補額之數

額勒登保又奏言竊

臣前奉

諭旨以王文雄柯藩慶溥溫承惠俱在平利紫陽洵  
陽白河一帶防堵德楞泰摺內並未提及一字

諭令確查具奏查松筠咨送摺稿惟時王文雄已往  
褒城之新集一路截剿賊匪其慶溥帶兵在秋  
山溝溫承惠派令把總王英等帶領鄉勇在暴  
溪溝埋伏所剿亦係高馬二股之賊德楞泰祇  
將伊一路殺賊情形入

告未將慶溥等提及自以向來邊境堵剿賊匪係由  
松筠具奏因此拘泥未經聲叙又候選從九品

維昂陳奏條欵

臣

詳細閱看其所稱鄉勇團勇

不宜虛給頂戴一條此次剿辦教匪地方紳士

團勇爲數甚多跟隨各路打仗鄉勇統計約有

四千餘名凡經出力之人原有祇給軍功頂戴

者亦有始終出力疊經奏請實用者如貢生劉

星葉已選用通判並給予五品頂戴

賞戴花翎其鄉勇頭目如桂涌現已游陞都司此外

拔補千總把總以及

賞戴藍翎者更不可勝數總視其人出力何如酌量  
獎擢並非一概虛給頂戴且劉星葉等多係四  
川本省之人雖昂寧不知之至臨陣捐軀之鄉  
勇亦俱陸續造冊咨部議卹此外尙有被賊戕  
害之紳士義民等現亦飭令各州縣查報均於  
事竣彙奏再雒昂所稱被賊圍裹割辮之人應



准復業殺賊出降者量予賞給一條臣上年在

陝省藍田一帶剿賊曾有拏獲及自行投出短  
辨之人並問有面刺白蓮教字樣者均經審明  
實係被脅卽行釋放並知會秦承恩通飭州縣  
一體辦理此後並有實在教匪割去髮辮在外  
探聽信息者亦曾經官兵盤獲審明正法至殺  
賊投出之趙耀宗等經夔州府具報勒保亦俱

奏明給予頂戴均有案據是羅昂所言三條皆  
係軍營久經辦理之事該員撫拾瀆陳無庸置  
議再擊獲偽總兵周思禮一犯前經許文謨送  
至達州交魁倫審辦是以前次摺內未將張禹  
苟崇德二人議賞今查張禹業已患病身故經  
通江令徐廷鈺賞其家屬銀兩其苟崇德一名  
魁倫已經賞有頂戴臣現又給予八品職銜執

照并諭以再能出力卽當奏請錄用均奏入

上命軍機大臣傳諭額勒登保曰此次鮮大川苟文  
明等經官兵在聖燈寺等處追剿先後斃賊四百  
餘名餘匪向道士灘逃遁額勒登保以該逆等既  
經折回必與徐逆等合夥遂令穆克登布等緊躡  
前進額勒登保卽帶兵探蹤截擊在後槽對面山  
梁分路追剿越過大山數重斃賊二百餘人又覓

道抄向亮風堽將鮮荷等逆衝殺殲賊三百餘人  
所辦俱好其各路打仗陣亡之遊擊阿克東阿夏  
鈞驍騎校富楚那把總廖榮領催愛彌達俱著咨  
部議卹又據奏軍營打仗義勇俱經酌量獎擢並  
非概給虛銜所辦俱屬妥協至所奏籌添馬匹一  
事此時追剿賊匪正當喫緊之時亟需馬力自應  
酌籌添補所有四川應辦馬匹業經額勒登保札

致魁倫就近採辦自可迅速解到軍營至雲貴二  
省應調馬匹亦諭令該撫等速行辦解現在節屆  
冬至天氣嚴寒特賞給額勒登保黑狐馬褂一件  
德楞泰魁倫貂鼠馬褂各一件額勒登保務須乘  
賊匪潰竄之時督飭各路官兵奮力追擊將各股  
著名首逆於年內一律剿除以副委任至此次用  
兵以來惟額勒登保超眾出力功績茂著朕深鑒

悉前將伊補授經略大臣當經諭以固不可似勒保之安坐遼州心存退縮然國體攸關亦宜加以慎重不可仍前一遇賊來卽向前迎敵本日據奏督率官兵擊剿各路賊匪情形似覺愈形躁急朕殊不釋懷在額勒登保因朕剋期盼捷欲於年內迅速成功具徵忠盡悃忱但現在軍營恃有額勒登保一人不可勞瘁過甚伊體本羸弱尤應仰體

朕懷自愛其身卽如安祿係海蘭察之子前於廓爾喀出兵時賞給巴圖魯名號今率領五六人乘騎追賊以致陣亡實爲可惜伊係公爵現任乾清門巴圖魯侍衛一旦歿於行陣已屬不值額勒登保自當加意慎重朕前此諭令必於年內成功原因從前領兵大臣不肯實心出力捏詞奏報遲之又久迄未成功嗣因勒保又稽延數月積玩成疲

義不嚴加催飭何時可冀肅清今額勒登保自簡  
任經畧以來各路官兵咸知振作屢獲渠魁自不  
難一鼓殲淨但現在情形仍須熟爲籌計如年內  
不能一律辦完卽遲至來春奏捷亦無不可額勒  
登保惟當存之於心勿預爲宣露也

上又命軍機大臣傳諭那彥成松筠曰松筠從前仰

蒙



皇考厚恩用爲軍機大臣在御前侍衛上行走嗣經派  
令駐藏數年未經換回仰窺

聖意未必非看其人近迂腐是以置之閒地本年朕親  
政之始因素聞松筠爲人尙能持正而在廷諸臣  
亦多稱其可用卽降旨召還擢用陝甘總督晉加  
官銜始而陳奏事件尙有可觀其後則有通弛私  
鹽私鑄等禁之奏所見實爲迂謬彼時朕不肯將

其原奏宣示會降旨西加飭諭乃伊數月以來辦理一切事務殊多錯謬卽如慶成係革職拏問應行審訊尙未定罪之人松筠輒令帶領撤拉爾回兵前赴西鄉實爲專擅錯誤當經降旨申飭並令其酌量情形另派大員帶領况此項回兵如果在陝剿賊尙能奮勉卽不應遽行撤回乃旣已檄調於前一經奉到諭旨旋卽撤回是西鄉一路無須

回兵在彼堵截已可概見則從前又何必多此檄  
調乎且回兵素性驕悍見松筠之忽調忽撤全無  
定見倘因此心生疑畏或至輕視松筠別滋釁端  
更復成何事體又如恒瑞本在甘境專辦藍號賊  
匪經松筠令其回陝以致藍號賊匪又復乘間他  
竄至今貽害本日據額勒登保奏遊擊阿克東阿  
原在甘省追剿楊開甲等股賊匪經松筠飭調帶

兵回至西鄉行抵界牌地方猝遇賊匪衝出阿克  
東阿力戰陣亡此又係松筠冒昧檄調之過阿克  
東阿係在甘剿賊之員若果聽其一手經理則此  
時楊開甲等當已早就撲滅乃松筠於剿賊喫緊  
之時又將該遊擊別行調遣以楊開甲等股賊匪  
委之川省致令逃竄而阿克東阿遂於中途遇賊  
陣亡是阿克東阿之死及楊開甲之遺孽至今未

盡實皆松筠之咎其種種調度失宜實爲迂濶而  
不中肯綮殊負委任本應將松筠革職治罪姑念  
一時簡用乏人著先將太子少保及御前侍衛一  
併革退並拔去花翎用示薄懲仍留頂戴以觀後  
效並傳旨嚴行申飭若能改悔奮勉自贖將來尙  
可邀恩尙尙不知愧勵或再有措置乖方之處則  
當從重治罪矣至那彥成係朕特派督兵剿賊之

員前此帶兵赴五郎一帶已覺稍遲而於軍務籌  
辦情形又未及早馳奏相隔兩旬始據續有奏報  
尤爲延緩而所奏情節並未遇賊接仗轉將終南  
山嶺谿澗情形敷衍聲叙如所稱瀑泉噴濺水凌  
凝滑之語幾似爲彼處山水寫照而其意尤不免  
存畏難之見殊屬非是那彥成在京時卽有請派  
黑龍江官兵之奏因已先行停調未允所請現在

派調盛京兵二千吉林兵一千陸續到陝皆係生  
力勁旅那彥成正當乘其新到銳氣用以剿賊乃  
又以盛京兵一千撥給柯藩是新到勁兵復以分  
而見單焉能得力若吉林兵到後亦似此零星分  
撥則追剿賊匪又將以兵少爲辭復請添調豈不  
又蹈從前帶兵大員陋習耶那彥成著傳旨申飭  
此時張漢潮餘匪爲數無多何得任其輾轉奔逃

迄未剿淨那彥成務須自知奮勵上緊追剿將張  
逆餘匪及陝境分竄之賊於年內一律肅清卽赴  
川省協剿倘再事耽延或至賊匪仍前奔竄稽誅  
則惟那彥成是問

上又命軍機大臣傳諭初彭齡馮光熊曰據額勒登  
保奏川省追剿賊匪急需馬力請於雲貴二省調  
馬各五百匹現在川省剿賊正當喫緊之時所需



馬匹自應速爲調解著該撫等或調撥管馬或就近採買照數速行派員解往至該二省採買馬匹若仍照例價派自民間則吏胥作奸不惟馬匹羸劣祇圖充數而閭閻又多擾累該撫等務須督飭所屬照依市價採辦或調或買得有成數卽以二百匹爲一起分起解送四川軍營沿途仍飭委員認真餵養毋致疲瘦干咎

同日

上諭內閣曰額勒登保奏乾清門侍衛安祿追擊賊  
匪至汪家山樹林內猝遇竄匪突出受傷陣亡安  
祿係海蘭察之子海蘭察在

皇考時屢次出師報効著有勲勞今安祿又復効命捐  
軀克承忠蓋實深憫卹所有安祿承襲伊父公爵  
著該旗查明卽准承襲無庸候至年底其應得卹

典亦著該部查例具奏

上又諭內閣曰額勒登保奏侍衛祥金保陝西河州  
右營遊擊金積福山東高唐營遊擊郭起麟俱年  
老患病請以原品休致祥金保等均經出師打仗  
受傷著有勞績今因年老患病未便仍留軍營著  
照所請俱准其原品休致

同日魁倫奏言查福寧所奏部撥餉銀短平十

一萬三千餘兩一案

臣

就近將總理達州局道

員石作瑞傳訊並一面札詢保寧成都二局一

面檄提原在川陝交界接收之同知那山面加

詢問據供前項部撥餉銀那山奉藩司委赴川

陝交界之廣元縣神宣驛收兌於嘉慶三年十

二月十三日起至二十二日止共收陝省委解

銀二百五十萬兩尙有五十萬兩先經陝省截

留那山眼同解員等逐匣秤兌與原來清冊所  
註觔兩相符又於每起抽出十餘匣同解員開  
看錠件零星腥色九九用庫碼比兌九六七八  
平不等隨將餉銀管解前進一面將接收抽兌  
情形通稟並於逐起發給陝省解員收管內註  
明九六七八平不等字樣又於本年三月初一  
日陝省解到撥還前次截留餉銀四十萬兩那

山復眼同解員逐匣開驗錠件零星賤色九九  
用庫碼比兌共實收庫平銀三十八萬七百五  
十六兩六錢照實數填給收管亦經通稟在案  
那山奉委接收餉銀安敢於衆人屬目之際少  
有侵蝕自蹈重罪且兌收餉銀係眼同陝省委  
員而填給收管係照實數註明如果餉銀並無  
短少該解員焉肯接收九六七八平之收管

臣

查部撥川餉係三百萬兩那山所稱前後接收  
陝省解到實止二百九十萬兩詢據福寧稱尙  
有十萬兩是陝省懸欠未還屢經咨催然福寧  
前次覆奏統稱餉銀三百萬兩共短平銀十一  
萬三千二百四十四兩零以二百九十萬兩作  
爲三百萬兩實收殊屬含混臣復細加詳核據  
那山接收陝省解還四十萬兩收管底稿內開

收過三十八萬七百五十六兩六錢及三局兌  
收又於原平短少之外復短平七百九十八兩  
七錢三分經該局道員石作瑞查據那山稟覆  
稱係在神宣驛正值賊警又因止帶省局一百  
兩砵碼一個並無零星小碼彈兌不及向舖戶  
借用市平幫兌倉忙急迫致有參差詳請將短  
平七百九十餘兩著落那山賠繳抑或量予寬



免另籌歸款之處請示福寧景安勒保乃福寧  
等並不核飭賠繳僅批仰候經畧公督部堂批  
示遵辦而勒保則批據詳已悉仍候督辦糧餉  
大人批示八月間福寧竟將那山所短之七百  
九十八兩七錢三分併爲十一萬三千二百四  
十四兩二錢四分俱作部撥原平短少具奏是  
福寧等於糧餉重務不但意存朦混顯有巧爲

脫卸通同舞弊狗私情事應據實補劄計廣興

日內卽抵達州

臣

當會同嚴切訊究歸案辦理

并詰訊勒保於局員請示短平之處有無朦混

情弊查明另行具奏再前項短平十一萬二千

四百四十餘兩訊據那山供陝省委員曾稱前

於潼關向山西委員接收俱係原稗原匣等情

應請

欽定大清會典事例  
卷一百一十五  
刑部  
三

敕下陝西山西等省挨查沿途押解之員是否彈兌  
均有短少侵盜等弊據實究辦至陝省未還川  
餉十萬兩因惠齡明亮德楞泰等帶兵前來川  
陝有川省糧員借用陝省銀兩者亦有陝省糧  
員來川供支明亮等糧務賬目未清者陝省藉  
詞將前項扣留屢催未解現已飭局查明分別  
劃清各款咨催解還以免牽混懸宕奏入

上命軍機大臣傳諭魁倫曰此案那山於平兌陝省解到餉銀因正值賊警未向舖戶借用市平幫兌致有參差其所短平七百九十餘兩福寧並不核飭賠繳將那山所短銀兩併入部撥原平短少項下具奏而勒保則據詳批令聽候督辦糧餉大員辦理是那山之辦理草率福寧之有心朦混勒保之意存推諉均有應得之罪那山著解任交與魁

倫會同廣興歸案質訊其所請飭下陝西山西等  
省挨查祇須魁倫行文該二省核實查辦若經朕  
降旨俟該二省覆奏到日再交川省查辦轉致往  
返需時也至福寧於那山短平之項既如此朦混  
則他人有似此短少及侵扣等弊亦難保其不代  
爲徇隱卽福寧亦尙恐別有情弊現在廣興卽日  
可到魁倫惟當會同嚴行查訊秉公辦理毋致不

賈不盡至現據額勒登保奏兵丁急需添置棉衣  
各項已札知魁倫飭局趕辦並需於川省就近添  
調馬五百匹此時正當剿賊喫緊之時魁倫務當  
迅速趨辦解赴軍營應用俾得於年內剋期蕩功

同日托津奏言竊廣興護送川餉由京起程茲  
末起餉銀於十月二十九日行抵川省之保寧  
府沿途與前三起按站接進均無阻滯臣先於

陝西之興平褒城等處連接川督魁倫咨稱川  
省成都保寧達州向共設立三局此次餉銀二  
百萬兩令將四十萬兩解交保寧六十萬兩解  
交達州其餘俱解成都省局臣當卽札致廣興  
令與魁倫商量畫一不拘作何分撥總期於軍  
需有濟隨接廣興復札據稱於接准魁倫咨文  
後業經具奏請以三起之五十萬兩解送成都

以四起之五十萬兩全解達州令臣於入川境  
後或徑解達州或停住數日俟奉到

諭旨再行分撥伏思入川首站係神宣驛地方窄狹  
並無城堡不便停留若徑解往達州設成都實  
需撥用往返運脚又多糜費查經過之保寧府  
爲兩路適中之地現有松茂道吉陞保在該處  
駐劄辦理軍需當將未起餉銀五十萬兩就近



交該道暫行存貯仍帶同道府侍衛章京等馳  
赴達州候

旨分撥辦理奏入

上命軍機大臣傳諭托津曰前此廣興奏請將餉銀  
先行解送省局五十萬兩以爲採買倉穀之用已  
照所請撥給成都應用矣此項未起五十萬自當  
徑解達州支給官兵俾無缺乏無庸留貯保寧著

托津飭令該處道員卽行解送達州存貯備用